

Em bi pêşwaziya 8'ê Adarê, Roja Cîhanî ya Jinê ve diçin. Em di demekê de vê roja cîhanî bibîr tînin ku hêj di piraniya welatên cîhanê û nemaze di welatên Rojhilata Navîn de maf û azadiyên jinan tînin bînpêkirinê. Bi vê boneya cîhanî em pîrozbahiyên xwe yê herî germ ji hemû jinên cîhanê û Kurdistanê dikin. Bi hêviya serkevtina xebata jinan bo azadî û wekhevîyê...
Desteya Weşana Agirî

Di Cinayeteke hovane Li Bajarê Bazirganê de:

5 Kes Ji Endamên Malbatek Kurd Hatin Serjêkirinê

Bersiya Sekreterê Giştî Yê PDK
Îranê Ji Bo 87 Xwendekarên ...



2

Zimanê Zikmakî, Şademara
Heyatî Ya Neteweyan



4

Arîşeyên Nû Di Navbera Dewlet
Û Arteşa Turkiyê De



5

HEMAN NAV Û EXLAQÊ
SIYASÎ



8

Daxuyaniya Komek Ji Çalakên
Medenî Û Aflgirên Mafên
Mirovan ...



9

DURISTÎ



10

Roja sêşem, 01.12.1385 (20.02.2007)an, hin kesên ne naskirî êrîş bi ser malbateke Kurd li gundê "Yarmiç" a derdora bajarê Bazirganê kirine û bi awayeke hov û nemirovane serê 5 kes ji endamên vê malbatê birîne.

Navê goriyên vê cinayetê wiha hatiye zanîn:

- 1- Riza Reşîdî (33 salî)
- 2- Meryem Eyare (26 salî)
- 3- Inayet Reşîdî (7 salî)
- 4- Lewzîn Reşîdî (2 salî)
- 5- Soniya Reşîdî (1 salî)

Hêjayî gotinê ye ku kes û karên kuştîyên han piştî haydarbûnê, bi merema eşkerekirina nasnameya bikujên wan, doz birine dadgeha Makûyê, lê her di gava yekemîn de dadgehê ne tenê tu cehdek nekiriye, belku gef ji wan xwarine ku nabe li pey vê pirsê bekevin, nexa li şûndeçûna vê arîşê dê ji wan re asteng û pirsgirêkên din çê bike.


Gumana vê çendê heye ku cinayeta han ji aliyê kirêgirtiyên rejîmê ve hatibe kirin, lowma rejîm tu hewlekê li hember de nade. Divêt were gotin ku xelkê gundê "Yarmiç"ê hertim piştevane û dilsojên tevgera rizgarîxwaz a gelê Kurd bûne.

Gera Yekem Ya Gotûbêjên Welatên 5+1 Hate Lidarxistinê,

GOTÛBÊJ DÊ ROJA PÊNCŞEMÊ BIDOMÎN

Roja duşem, 26'ê Şibata 2007'an gotûbêjên nûnerên pênc endamên dayîm yê Konseya Ewlekariya Rêxistina Neteweyên Yekbûyî tevî Almanya, naskirî bi girûpa 5+1, ji bo amadekirina biryarnameyê nû li dijî Îranê li bajarê London ya Îngilîstanê li hev civiyan. Wan nekarî li ser gera nû ya diyarîkirina cezayan li ser rejîma Komara Îslamî ya Îranê li hev bikin û biryareke nû bigirin. Rejîma Îslamî ya Îranê ji ber meşandina bernamêyên xwe yê Etomî û meyandina Uraniyûmê ji aliyê Konseya Ewlekariyê hatiye

cezakerinê (biryara 1737), lê ji ber ku dest ji xebat û hewlên xwe li dor zengînkirina Uraniyûmê ber neda, welatên han biryar girtin ku ji bo girtina cezayên gera duym bi hevve kom bibin. Amerîka û welatên din yê Ewropayê gihîştine ser vê baweriyê ku xebatên Etomî yê Îranê ji bo bidestxistina bombeyên Etomî tînin encamdan, ji ber vê çendê, wan careke din ji dewleta Îslamî ya Îranê xwestin ku bi berçavgirtina biryarnamê 1737'an ya Konseya Ewlekariyê ya NY'ê hemû xebatên xwe yê mehandina Uraniyûmê hilawise. Qirar e ku gotûbêjên welatên 5+1 di vê derbarê de sibê roja pêncşem bidomin.



Ronvekirina Sekretariya PDK Îranê, Derheq Nameya 87 Xwendekarên Kurd Di Zanîngehên Îranê De û Bersiva Sekreterê Giştî Yê PDK Îranê Bi Nameya Han

87 xwendekarên Kurd di Zanîngehên Îranê de derheq cudabûna taqîmek ji Kadro û Pêşmergeyên PDK Îranê û rexneyên xwe seba vê cudabûnê û mehkûmkirina wê û di heman demê de piştgiyariya xwe ji PDK Îranê, komek rexne û pêşniyar ji bo Sekreterê Giştî yê PDK Îranê şandine û daxwaz kirine ku bersiva nameya wan bihê dayîne.

Di vê nameyê de qala vê çendê hatiye kirinê ku di vê derbarê de wan nameyek ji bo Mamosta Ebdula Hesenzade şandine û hinek rexne ji ji wî girtine.

Ji ber girîngiya nameya han û her wiha bi liberçavgirtina vê rastiyê ku naveroka wan namane dikare gotin û pirsên hejmarek zaf ji xelkê dilsoz û demokratperwer yê Kurd di Kurdistana Îranê de be, Sekretariya PDK Îranê bi baş zanî ew nameya ku ji bo birêz Sekreterê Giştî yê PDK Îranê hatiye nivîsandinê û bersiva wê ji belav bike.

Em hêvîdar in sûd û feyde jê were wergirtinê.

Partiya Demokrat ya Kurdistana Îranê

Sekretariya

14.02.2007

25.11.1385



Nameya 87 Xwendekarên Kurd yê Zanîngehên Îranê ji bo Sekreterê Giştî yê PDK Îranê

T evî silavên şoreşgerane!
Rêzdar Mistefa Hicrî,
Sekreterê Giştî yê PDK Îranê!
Di destpêkê de serbarê xuyakirina

xem û nerhetî ji bo cudabûna vê dawiyê di nava refên PDK Îran de, em weke Civaka Xwendekarî ya Kurd li Îranê tevî mehkûmkirin û bi şermzanîna vê kiriyarê di vê dema nazik û çarenivîsaz de ku herêma, Îran û Kurdistan tê de derbas dibe, ne tenê di xizmet û berjewendiyên tevgera gelê Kurd de nine, belkî zirar û ziyaneke ne şûndanê ji xebata rizgarîxwazane ya Kurd dide û çî tişteke din ji bilî dilxweşî ji bo dijminên gelê Kurd û neyarên PDK Îranê di vê cudabûnê de nabîne. Her cudabûn û veqetiyaneke di nava her yek ji aliyên siyasî yê Kurdistanê, di vê dema nazik û hestyar de tenê viyan û îradeyê ji bo her çîqas zêdetir kirina serkut û tund û tûjiyên xwe li hember civatên xelkê de dide dujminên neteweya kurd, lewra bi baweriya me veqetiyên û cudabûn di vê demê de bi tenê hêlana civatên xelkê Kurdistanê di çeper û orta xebatê de ye û sehnekirin bi berpirsiyariyê li hember ew erk û wezîfeyan e ku li ser milê we ne. Civaka Xwendekarî (Camiê Danişcoyî) daxwazê ji tev opozîsyona Kurd bi giştî dike ku bi hestkirin bi berpirsiyariyê û bi dengeke hevgerî ji bo parêzvanî û berevanî ji mafên civatên xelkê Kurdistanê hewlê bidin.

Rêzdar Mistefa Hicrî!

Renge ji bo gelek kesan tişteke gelek ecêb be ku di demeke wiha de, Civaka Xwendekarî yan her yek ji tex û qatên xelkê Kurdistanê, ji Partiya Demokrat berevaniyê bikin yan rexne bikin, lewra nişandana helwesta bi vî awayî di her demekê de yan ji bo her kes an aliyekê nabe, belkî heke em bi çaveke vekirî ve mêzeyî pirsan bikin, ji her kesekê re derdikeve ku sedemên wê çî ne.

Heke em bihên pesna PDK Îranê bikin, em dibêjin:

Zanîngehek e, ku ji destpêkê re biryar hate dayîn ku waneyên welatparêzî, mafê gel,

parastina welat û niştîman, azadî û hwd... tê de werin gotinê. Li ber destên xortên herî demokrat, herî aşîxwaz, herî zana û herî xweştevî yê sedesala 20'an, zanîngehek teji ji mamosta (fêrkar) û şagirdên xweşnav û welatparêz perwerde bû, perwerdekerê bîr, bawerî, hizr û ramanekê nûjen û paqij.

Lewra li vir derdikeve ku armanç ne berevanîkirin ji takekes e, belkî ji bo hebûna neteweyekê ye, berevanî, parastin û zindîragirtina dengê neteweyek belengaz, parastina mînberekê ye ku dengê bêpariya xwe digehîne guhê gelên din, lewra dibêjim: Ev nameya me, hawara hezaran evladden şehîdan e, dengê ew kesa ye ku wekî qeleyeke hesin ku di rojên tarî yê Firewnên herî xwînmij, herî bêwijdan û herî nazan yê îro de ne û ji bo hatina roj û ronahiyê çav li rê ne.

Hêja, Hicrî!

Civaka Xwendekarî ya Kurd bo rêzgirtin ji pîrensîpên demokrasiyê û ji bo cihgirkirin û herwiha hînbûnê, fêrkirina ceribînên demokrasiyê bi civatên xelkê Kurdistanê, bi pejirandina rewşa û şeriyeta kongreya 13'ehem ya PDK Îranê, serbarê rexne û gazindiyên zaf û bicih ji we yê rêzdar û pêka baweriya kûr ya Civaka Xwendekarî ya Kurdî bi wateya naverok û kakila demokrasiyê, piştgiyariya xwe ji bo hurmet û berheqîya kongreya sêzdehem ya PDK Îranê îlan dike û alîkariya fikrî û menewî tevî rêberiya partiye radigehîne û em daxwazê ji we yê rêzdar dikin, bi liberçavgirtina usûl û azînen demokrasiyê, bi dilekî vekirî, rexne û pêşniyarên Civaka Xwendekarî ji bo her çîqas çêtir birêveçûna kar û xebatên partiye ku di van xalên jêr de tên, berçav bigirin.

Birêz, Hicrî! Her wekî em hemû dizanin, piştî şehîdkirina Dr. Qasimloyê rêber û mamostayê mezin yê gelê Kurd, xweştevî û hezkiriyê civatên xelkê Kurdistanê bi giştî û nemaze ciwan û xwendekarên û li pey şehîdkirina Dr. Şerefkendî, rûçikê rastbêj, micid û wefadar bi Kurdistanê, xebata gelê Kurd bi giştî û PDK Îranê bi taybetî bi gelek

tiştên ne hewce û bênaverok re berbirû bû.

Berbirûyê gelek bername û pilanên sepanî ji her aliyekê ve bû. Dengê Partiya Demokrat bi hewl û cehda du rêberên şehîd sînorên xwe bezand, ber bi vê hindê diçû heta di nava kom û komeleyên navdewletî de, cihêkê ji bo xwe û gelê Kurd peyda bike, lê bername û pilanên sepanî yê gelek kesan li hundir û derveyî partiye, roj li pey rojê rastî têkçûna siyasî, bi wateya xwe ya tewaw hat û di heyamê dehsala derbasbûyî de rastî gelek qeyran û kirîzên navxweyî bûye.

Hinek ji rêberên partiye bêy ve çendê ku di fikr û hizra peydakirina mekanîzmeke çêtir de bin, roj bi roj diyarok û berçaviyên kirêt û xirab wekî bask û baskçêkirin, herêmcêti û ... di nava refên partiye de xurt û bihêz di hate kirin û rêberên partiye, dijminên eslî û xebata rastîn ji bir kiribûn. Heta ve çendê ku bi nav **navdarên partiye**, partî rastî veqetiyaneke din kir.

Lewra Civaka Xwendekarî di nameyeke cuda de ji bo rêzdar Hesenzade, daxwaza ravekirin û ronvekirina zelal û usûlî ji bo Civaka Xwendekarî ya Kurd dike.

Rêzdar Hicrî! Civaka Xwendekarî serbarê rexneyên zaf ji we yê birêz, dibêje gelo Mistefa Hicrî di heyama 10 salên borî de, wekî endamekî rastbêj û xwedî derbasbûyîyekî paqij, nekarî yan nexebitî bona ji navbirina pîrsgirêkên partiye, heta ku ruha alîkarî û bi hev re karkirinê di nava partiye de hêdî hêdî ji nav çû û partî tûşî ve qeyran û kirîzê hat?

Hêja, Hicrî!

Civaka Xwendekarî ji bo serxistina kar û xebatên partiye û bona zindîkirina ruha hevkarî û bi hev re karkirinê, pêşniyar û têdîtinên xwe ji bo partiye û şexsê we yê rêzdar re ku di nav çend xalên jêr tên, dixê ber destê we. Em hêvîdar in ku bi li berçavgirtina berjewendiyên neteweyî û sehkirin bi berpirsiyarîkirinê heya wî çihî ku çê be û îmkân hebe, di kar û bernameyên partiye de kar pê bikin. Em hêvî dikin ku me bi vî awayî ji bo tejiyê kirina mewda û fasîleya navbera partiye û civatên xelkê bi giştî û

nemaze ciwanên xwendekar gav avêtibe û ev yek pêvajoyê bona beşdarîkirina tev civatên xelkê xweş û hêsan bike, di rêvebirina karên partiyê de, em hewlê bidin bi beşdarîkirina giştî aliyekê, partiyê vegeerînin bo nava dilê Kurdistanê.

1. Vegeriyar bo nava kom û komeleyên navneteweyî û hundirîn, bi hêz û qaweteke zêdetir ji berê, yek ji wan vegeriyar bo nava rêxistina navneteweyî ya Enternasyonala Sosyalîst.

2. Giringîdan bi ciwanan û perwerdekirina endamên partiyê û li şûndana ew paşdemayîna partiyê di warê perwerdehiya Kadroyan de.

3. Biha û giringîdan bi ciwanan û beşdarîkirina wan di kar û barên partiyê de, nemaze post û berpirsiariyên bilind, bi armanca elimandina wan ji bo pêşeroja partiyê, herwiha mifawergirtin ji wan kesên ku ji Îranê direvin û danîna wan li gorî şiyar û karîna wan di cihê jêhatî de.

4. Jordebirina radeya hişyariya jinan di warên civakî, siyasî, çandî û wd... . Şûndan û hevberdana wê binirx û bêqîmetkirina ku di salên derbasbûyî de derheq jinan hatiye kirin û neçarkirin û beşdarîkirina wan di kar û barên partiyê bi awayekî çeleng û zindî.

5. Bersivdan û rû bi rû bûn bi awayên mentiqî û hemdem tevî pêvajoya rojê de, li hember ev kes yan aliyar ku bêhurmetî yan sivikatiyê bi rêberên neteweya Kurd dikin ku her kes çavniheriya vê çendê ji Partiya Demokrat wekî partiyek neteweyî, li Kurdistanê ji bo berevanî ji gel û welat heye.

6. Bilind û zindîragirtina felsefeya fikrî ya Dr. Qasimloyê nemir û tekezirin li ser kesayetiya zanistî, siyasî, çandî û civakî a wî rêberê mezin û nasandina herçiqas bêtir ji bo ciwanan û zindîragirtina bîranîna partiyê bi giştî û rêberên şehîd bi taybetî.

7. Girtina helwesta bicî û jêhatî di dem û çaxê xwe de, li hember ew guhartinên ku di pêşerojê de çavniherî jê tê kirin ku dê ji bo gel û partiyê derkevin rojevê û xwe berhevkerin ji bo pêşerojê.

8. Axavtina û hevpeyvînên taybetî (şexsî) û hizbî ji hev bihên cudakirinê û her hevpeyvînek ku bi navê partiyê ve dibe, bila bi hevahengiya tev endamên rêberiyê be, heta partî û biryarên partiyê bandora erênî li ser guhartinên nav civaka Kurdistanê hebe.

9. Diyarîkirina hin kesên jêhatî wekî nûnerê Sekreterê Giştî bo kar û barên ciwan û jinan û ji bo gihîjandina arîşe û pirsgerêkên wan bi Sekreterê Partiyê, heta bi hevkarîya tev aliyekê em bihewilînin mekanîzma herî baş ji bo kêmkirina pirsgerêkên taybet bi wan kesan bikar binîn.

10. Tekezirin li ser pêşdebirina siyasatên partiyê li hember Komara Îslamî li bajarên Kurdistanê ku gefa ji holê rakirina nasnameya Kurdistanê jê tê kirin weke Başûrê Kurdistanê: Makû û ..., Bakûra Kurdistanê wekî Kirmaşan, Îlam û ..., heya ku di pêşerojê de ji bo Kurdistana Rojhilat, Kerkûkek din çê nebe, lewra hewce ye serkirdayetiye Kurd bi giştî û rêberiya Partiya Demokrat bi taybetî di hizra bername û pilanek baş ji bo wê demê danên.

11. Giringîdana herçiqas bêtir bi zaravên din yê zimanê Kurdî di dezgehên partiyê, ji bo xizmetkirina zêdetir bi wan zaravan û dewlemendkirina awayê diyalekta siyasî ya PDK Îranê bi awayekî berfireh.

12. Zengînkirina herçiqas zêdetir ya televîzyon, radyo, rojname û kovarên partiyê di warê naveroka zimanê wan û bernameya baş û bisûd û

13. Gazîkirin û vexwandina bi şan û şeref ji wan Kadro û Pêşmergeyan ku ji partiyê derketine, heya careke din bo nava partiyê vegeerînin. (ev yeka ji bo wan kesan nabe ku bêhurmetî yan sivikatiyê bi partiyê û rêberiya gelê Kurd kirine).

Birêz Hicrî!

Civaka Xwendekarî ya Kurd hêvîdar e, PDK Îranê bi bernameya baş û bi hêzek mezin û bi wateya xwe ya kemilî vegere bo nava kom û komeleyên navneteweyî û hundir. Bila bi hewl û tekoşîna hemû civatên xelkê Kurdistanê em ji bo bidestveanîna mafên zevtkirî yê gelê Kurd bixebitin.

Civaka Xwendekarî ya Kurd di Zanîngehên Îranê de

Silav li canê paqî yê şehîdan

Silav li girtiyan siyasî

Silav li Qasimloyê zana

Serkeve xebata neteweyî ya xelkê Kurdistanê

Têdîtin:


Erkê gehandina vê nameyê li stûyê hevalê cihê hitbar û baweriyê yê Civaka Xwendekarî, Kekê Kamran Resûlî li welatê Swîsê ye ku wî ev kare bi berpirsiyarî ve girtê stû.

Bersiva Sekreterê Giştî Yê PDK Îranê, Rêzdar Mistefa Hicrî Ji Bo 87 Xwendekarên Kurd Di Zanîngehên Îranê De

J *i bo 87 xwendekarên
Kurd di Zanîngehên
Îranê û ew eziz û*

*xweşteviyên din ku naveroka
nameyê gotina dilê wan e ji
Silav û hurmet!
Gelî rêzdaran!*

Nameya we gihîşte destê min, rexne û pêşniyarên we ku ji hesta germ û gur ya welatparêzî û dilsoziyê ji bo neteweya me ya belengaz û zulmêkirî çavkanî girtibû, ez zêdetir ji berê bi pêşeroja ron û zelal ya azadî û rizgariyê hêvîdar kirim. Çi peyamek ji vê hêvîdartinê e ku komek ji xortên hişyar yê gelê me di vê



rewşê de ku hin kes – her çiqas kêm – toyê bêhêvîtiyê di dilê xelkê me de diçînin û dixwazin wisan nîşan bidin, yan wilo fêhm kirine û tê gihîştina ku cudabûna komek ji Kadro û Pêşmergeyên PDK Îranê, xebat ji bo rizgarî û serbestiyê kuta bûye û hevdeng tevî dehan hezar kes ji xortên demokrat piştarta partiya xwe digirin û partiyê ber bi pêşketinê hay didin û eyb û kêmasiyên wê jî destnîşan dikin û digehînin rêberên wê. Em van rexne û pêşniyarane bi hembêzeke vekirî werdigirin, ji ber ku em li ser vê baweriyê ne ku rexne bi wateya xwe ya resen, alîkar û hêza liv, hereket û berbi pêşveçûnê ye. Ji bilî vê yekê hûn xwediyên rastî yê PDK Îranê ne û rexnegirtin û pêşniyarkirin erkê we ye, lewra kes nikare ji wan rexneyan dilgiran bibe.

Hevalino, gotin û qise gelek zaf in, lê di vê derfetê de, ez dê bi kurtî bi we re bipeyivim:

Kongreyaya Sêzdehem ya partiya me rast ji bo wan merem û armancan pêk hat ku we di pêşniyarên xwe de qala beşek ji wan kiriye. Nûbûn, rê û derfetdayîn ji ciwana re û amadekirina wan ji bo bidestvegirtina rêberiya partiyê, alîkarîwergirtin ji hêz û şiyana jinan, nûkirina ragihandina partiyê, guhertin di pêkhatiya partiyê bi awayekê ku bersivderê serdem be û hwd... . Lê mixabin her di gava yekem ya piştî Kongreyê de, pirsgerêkên hundirîn berçêla me girtin û tu delîve û fersendek ji bo çibicîkirina bernameyên Kongreyê ku xwestek û daxwaziya bicî ya endamên partiya me bû, nehêla, ku ewa bi xwe "Mesnewî heftad men kaxez şewed" (merem ji vê gotina Farsî eva ye ku baskirina vê pirsê qasê 70 Men –her menek 3 kg e- kaxizê cih dixwaze). Rêberiya partiyê ku di vê heyamê de hewl û bizaveke zaf da ku ew hevalene li cihê mihanegirtinê, kar bikin û dengê piraniya zaf ya xelkê bipejirînin, heta em amade bûn ku ji bo razîkirina wan kongreyaya çardan gelek zûtir ji dema xwe pêk binîn, lê nehate pejirandinê û ewa ku qewimî ku ji bilî wan bi xwe û dujminên gelê me, kesê ew tişt nedixwest.

Niha ku ew arîşe nemaye, dema vê yekê hatiye ku em bi micidî kar bikin û bernameyên kongreyê çî bi cih binîn. Me dit ku di gava yekem de, di civîna nehemîn ya Komîteya Navendî de du jin wekî endamên Ravêjkar yê Komîteya Navendî hatin hilbijartinê û em dê gav bi gav û li gorî îmkân û derfetê soz û ehdên din ên kongreyaya Sêzdehem ku pêşniyarên we jî li xwe digire, çî bi çî bikin. Ji ber ku rêberiya partiyê bawerî bi pêkanîna wan guhertinane heye û di hember kongreyê de xwe bi sozdar dizane.

Di vê rêyê de em çavniheriyê ji we û hemû dilsozên PDK Îranê dikin ku her wisan bi me re bin, bi rexneyên xwe alîkariya me bikin û bi piştevanîya bêrawestiyar ya xwe weke herdem ber bi serkevtinê hêz û qawetê bi me bibexşînin.

Partiya Demokrat ya Kurdistana Îranê, partiya hemûyan e, partiya gelê Kurd di Kurdistana Îranê de ye, lewra bi şiyar û karîna me tevan dê berbi pêşve gavan bavêje.

Her bijîn bo partiyê û gelê me

Hevalê we – Mistefa Hicrî

14.02.2007

25.11.1385

Zimanê Zikmakî, Şademara Heyatî Ya Neteweyan

Selîm Zencîrî

Yek ji hewcehiyên bingehîn yê civaka mirovahiyê û alava çêkirina têkiliyan û pergala li hev halbûnê ziman e. Ziman keresteya derbirîna hest û soz û veguhastina ceribîn û zanyariyan bi hevdu re ye. Ziman bi seneda şûnas û nasnameya neteweyî ya her neteweyekê tê hesabandin û di rastî de yek ji pîvanên selimandina her neteweyekê, girêdayî hebûna zimanê wê ye. Bi awayekî din, ziman şademara heyatî ya hebûna neteweyan e û bi birrîna vê şademarê jî hemû biha û mîratên çandî yê wê neteweyê, jî dikarin werin jinavbirinê. Çimku tepeserkirina çandî ya neteweyan ji ziman ve dest pê dike, herwiha geşe û pêşxistina çanda neteweyan jî di gava yekem de bi geşeya zimanê wan girêdayî ye.

Li gor çavkaniyan niha 6000 zimanên cur bi cur di cihanê de hene ku bi hev re karwanê şaristaniyê û mîratê mirovahiyê pêk tînin û her yek ji wan jî bi xezîneya çandî ya neteweyan tê hesabandinê. Li ser mirov e ku vê mîrata binirx biparêze û berevaniyê jî mafê jîn û geşandina zimanê xwe bike. Lê mixabin bi sedemên cur bi cur yê siyasî, dîrokî û ... gelek ji wan zimanan bi mirin û nemanê re berbirû bûne. Lewra Rêxistina Yoniskoyê ji sala 1999'an ve roja 21'ê Şibatê wekî **Roja Cihanî ya Zimanê Dayîkê** binav kiriye û daxwazê jî hemû welatan dike ku girîngiyê bi curbicurbûna zimanan û geşandina wan bidin û ji bo parastina wan cehd û xebatê bikin. Herwiha di Daxuyaniya Cihanî ya Mafê Mirovan de hatiye ku zimanê dayîkê jî mafên bingehîn yê mirov e û tekezê li ser vê hindê dike ku erkê hemû welatan e delîveya xwendin bi zimanê zikmakî û geşandina wê bo neteweyan pêk bîne.

Lê mixabin rûpelên dîroka mirovahiyê di vê derheqê de tejjî ji zulm û zordariyê ye û şahidiya gelek bûyerên tal ji me re dide ku çiqas cinayet derheq bi vê mîrata çandî ya mirovahiyê hatine kirinê. Herwiha ji aliyê din ve jî xebat û berxwedanê û qurbanîdana azadîxwazan û neteweyên bindest li dijî xedar û çimisankerên maf û azadiyan ji me re nişan dide ku bi rûpelên zêrîn li dîroka xebata çawsaweyan tînin hesabandinê.

Li vê derheqê de hikûmet û rejîmên dîktator û totalîter cehd û tekoşînek zaf bo bêparkirina gelan ji vî mafê siruştî meşandine, heya ku bi berbendkirina zimanê wan, rê ji bo soştina navê wan di dîrokê de xweş bikin. Çimku ziman faktera eslî û bingehîn ya nasnameya neteweyî ye, lewra pitir ji her fakterên çandî yê dinê rûçikê siyasî bi xwe digire û dibe bi mijara pirs û nîqaşan.

Siyaseta qedexekirina zimanê dayîkê di welatên nedemokratîk û dîktator de her di yekem roja dibistanê de dest pê dike û ew rola erênî û pozetîv a dibistanê ku bi pira navbera malbat û civakê tê hejmartinê, di wan welatan de berevajî dimeşe. Ji ber ku zarok di yekemîn girîn û çavvekirina xwe de, bi soz û atife û zimanê diya xwe re nasyar dibe, bi zimanê diya xwe hîniştan dibe,

têkiliyan pêk tîne û hêdî hêdî hesta neteweyî ya wî/ê xurt dibe.

Lê di yekem roja dibistanê de bi ziman, perwerde û metodek din berbirû dibe. Zimanek ku heya wê demê hîn bûye û pê peyiviye û kariye hest û sozên xwe pê bîne ziman û rûmet û şanazî pê kiriye, di dibistanê de nahê bikaranînê û xwediye tu biha û hitbarekê nîne. Lewra bandora nerênî li ser rewan û pisikolojiya wî/ê dike, hundir û kesatiya wî/ê hûr dike û ji qasa hitbar û baweriya wî/ê bi xwe, malbat û civaka wî/ê kêmtir dibe.

Erê gelo ger meremek şovenîstane û dijî mirovî bona helandin û asmîlekirina ziman û çanda neteweyekê ninin, çima xwandin bi zimanê dayîkê qedexê dikin? Ger merema wan têkdan û tevlihevîkirina nasnameya neteweyekê û nehiştin û reşkirina wê di dîrokê



de nebe, başe em dikarin çî navekê lê bikin?

Niha em di demekê de dijîn ku kerameta însanî û mafê mirovan bûye bi elinda dirûsmên navend û sazîyên medenî, rewşenbîrî û Rêxistina Neteweyên Yekbûyî, lê niha jî hin netewe dixuyin ku ji aliyê neteweyên serdest û rejîmên dîktator û serberedayî ve tînin çewisandin. Îran jî ku welatek pirneteweyî, pîrzimanî û pîrçandî ye, ji mîratek dewlemend û binirx ya çandî ve bi mifah e. Gelên Îranê ku xwediye dîrokek dîr û dirêj ya bi hev re jiyana li vê cihwarê yadigar û mîratmayî ji bav û kalên xwe ne, lê mixabin bi salan e ku gelên ne Fars ji zulm û zor, bêmafî, fetisandin û tepeserkirina rejîmên desthilatdar di Îranê de dinalînin, ji mafên herî destpêkî yê xwe ku xwandin bi zimanê dayîkê ye, hatine bêpar kirin û ne tenê delîve û fersenda "sermayegozarî", lêkolîn, geşandin û pêşxistina zimanî û çandî bi wan re nehatiye dayîn, ji ber ku rêya perwerde û hînbûna zimanê wan jî, ji wan re hatiye qorixkirinê û tu pûte û girîngiyek bi wê xezîne û mîratên çandî yê neteweyên ne Fars nedane. Nemaze di hin deveran de jî siyaseta guhertina demografiya parzemînê dayîk yê neteweyan ji rêya veguhastin û mişxetên neçarî bi merema têkdana nasnameya wan û helandin û asmîlekirina wan

di neteweya Fars de birêve birine û dibin.

Qedexekirina ziman û asmîlekirina neteweyên bindest di Îranê de kirine bi pêxora ser sifrika xwe ya bi navê Farsîsizmê. Rejîm xwe û neteweyên din yê Îranê li gor ziman û nasnameya kêmaniya serdest û desthilatdar a neteweya Fars pêname dike û nejadperestiya Farsîsizmê kiriye bi siyaseta fermî ya xwe û dixwazin bi yekcarî rûçik û bejna neteweyên Îranê bi kinc û demamk a Farsîsizmê bipeçivînin (veşêrin). Rejîm dixwaze bi hêceta yekîtiya netewî û pêşgîrî ji parvebûna Îranê bigihîje merem û armancên qirêj û mirar yê xwe û berevajî xwasta neteweyên Îranê wan li jêr yek ala, yek ziman, yek çand û neteweyek yekdest de bihelîne. Her terze xebat û tekoşînek jî ji aliyê neteweyên bindest bo bidestveanîna mafên rewa û berheq yê xwe yan pêşgîrî ji wan merem û kiryarên mirar yê wan bi tawan û guneha cudaxwaziyê tînin mehkûm û tepeserkirinê. Helwest û kiryarê ku bi salan e di Îranê de meşiyaye û dom dike.

Bi vî awayî zulm û îxanetek mezin bi

neteweyên Îranê û cinayetê mezintir jî bi karwanê şaristaniyeta mirov û xezîneya çanda cihanê kirine. Serbarê wan hemû zext û qivaşane jî gelên bindest yê Îranê bi taybet gelê Kurd karîne heya vê gavê jî ziman û çanda xwe biparêzin û jê xwedî derkevin û weke çiyayek qahîm li hember vê stîratejiya rejîmê de rawestiyane û çepera xebat li dijî rejîmê xurttir kirine. Bi xweşî ve niha em dibînin ku pîrsa neteweyî jî pitir ji her demekê bi taybetî di Îranê de girîngî peyda kiriye û asta hişyariya neteweyên Îranê çûye jor. Îdî dema qedexê û astengkirina peyvan bi ser

çûye, ji ber ku divê asteng û sînoren ser rêya wan berbendan bikên hilgirtin.

Di encam de Komara Îslamî çî din nikare dirêjî bi îdeolojiya hişk û berteng û vê siyaseta nejadperest û şovenîstane ya xwe bide û înkara pîrzimanî û pîrçandî ya gelên Îranê bike û li hemberî wan de xemsar be. Divê rejîm rê û delîveya xwendin û geşandina zimanê zikmakî û îmkatanên perwerdeyîyên hewce bo wan misoger bike û wan bi fermî nas bike û dawî bi vê hizr û îdeolojiya paremayî û sedsala navîn ya xwe bîne heya ku hemû gelên Îranê bê tirs û cudahî bikarin di bin çetra edalet û yasayê de ji mafên wekhev bi mifah bin.

Lê lînhêrînek bi derbasbûyî, kakil û ew siyaseta îdeolojiya nateba û dijî mirovî ya Komara Îslamî, rejîm nikare bersivderê xwest û daxwazên gelên bindest û mafxwaz yê Îranê be û divê were hilweşandin. Lewra take rê û alternatîva ku bikare garantiya misogerbûna maf û azadiya gelên ne Fars di Îranê de bike û yasa û edalet tede bibe serwer û gelên Îranê di atmosferêk aram û bêtîrs de bikarin geşe û vejandinê bi çand û ziman û kultura xwe bidin, avakirina sistemeke demokratîk û federal di Îranê de ye.

Arîşeyên Nû Di Navbera Dewlet û Arteşa Turkiyê De

Azad Kurdî

Sîstema rêvebirina desthilatê li Turkiyê bi awayekê ye ku pir caran di navbera du desthilatên dewleta fermî û Arteşê de wekî hêza veşartî û nepenî, dijberî li dor pirsên hundirîn û derveyî tê holê. Serbarê vê çendê ku bi awayekî qanûnî û fermî dewleta hilbijartî û kabîneya wê berpîrsê bi rêvebirina welatê Turkiyê ye,



lê di rastî de di destpêka avabûna Komara Turkiyê de, yanî 80 salên borî zêdetir e ku leşkerî yan Arteşiyên Turkiyê weke desthilata sîberê bandor û zêrevaniya bêrade bi ser kar û barên hundir û derveyî ên wî welatî de dikin.

Ev dijberî û nakokiyane di heyamê heftî û rojên derbasbûyî de zêdetir derketin rojêya siyasî ya Turkiyê. Helwest û gotinên Recep Tevîb Erdoxan, Serok Wezîrê Turkiyê, derbarê hewcehiya têkîlî û hevdiîtan tevî berpîrsiyarên Hikûmeta Azad ya Kurdistanê li pey vegeyriyana xwe ji sefera Turkmenistanê, Arteşiyên wî welatî berbirûyê dewletê kirin û li hember gotinên wî bi xurtî dijkiyar ji xwe nîşan dan.

Erdoxan got ku dixwaze têkiliyên baş yê diplomatîyê bi Hikûmeta Herêma Kurdistanê re ava bike ku bû sedema nigeranî û nerazîbûna berfireh ya Generalên Arteşa Turkiyê û dijberiya xwe ya tund tevî vê peyama Serok Wezîr dan xuyakirin. Tevîb Erdoxan, qala vê çendê dike ku hevdiîtan bi Kurdan re dikare encamên baş hebin û ew amade ne ku tevî berpîrsiyarên Hikûmeta Azad ya Kurdistanê danûstandin û gotûbêjên fermî pêk bînin.

Berevajî helwesta Generalên Arteşê, ev gotinên Serok Wezîrê Turkiyê tevî pêşwaziya germ ya rayedarên Hikûmeta Herêma Kurdistanê rû bi rû bûn.

Serok Erkanê Arteşa Turkiyê, General Yaşar Buyukanit ku heftiya borî seredana Dewletên Yekbûyî yê Amerîkayê kir bû û tevî berpîrsiyarên bilind yê Amerîkayê civiyabû, li wir jî diyar kirbû ku rayedarên dewleta Azad ya Kurdistanê piştigiriya Kurdên Turkiyê û herwiha hêzên PKK'ê dikin û li dijî gotinên Erdoxan rawestiya û got ku ev gotin û helwestên Erdoxan li dijî berjewendiyên Turkiyê ne. Ev pêvajoye ji

nigeraniyên tund yê Arteşiyên û rayedarên nejadperest yê Turkiyê bona berbîpêşdeçûna doza Kurd û xurtbûna Hikûmeta Herêma Kurdistanê Îraqê û tirs ji teşenkirina wê rewşê ji bo Kurdistanê Turkiyê çavkanî digire.

Di helwestek cuda û dijberî Arteşiyên de, Ebdula Gul, Wezîrê Karê Derve yê Turkiyê eşkere kir û got: "Ya baş eva ye ku Arteşî mijûlê erk û wezîfeyên xwe bibin û rêyê bidin ku siyasetvan kar û barên siyasî

bimesînin. Ew mijarên ku divêt Arteşî li ser wan biaxivin, cuda ne û herwiha cihê axavtina wan jî bi ferq e û ewa karê dîplomatî û siyasetvanan e, ne Arteşiyên".

Ev helwest û dijkiyarên hemberî hev, bi kiryar Turkiyê bi du eniyên **aligirên dewletê û aligirên Arteşê** parve dike, bi awayekê ku Serok Komarê wî welatî tagirî ji gotin û helwesta Arteşiyên kir!

Arteşa Turkiyê û gelek ji hêzên nejadperest yê wî welatî tevî her cure têkiliyekê bi hikûmeta Federal ya Kurdistanê re dijberiyê dikin û kirine û ev yek wekî **hêla sor ya Ankarayê** bi nav kirine. Heyameke zaf e ku ji aliyê karbidestên Turkiyê derheq diyarîkirina çarenivîsa bajarê Kerkûkê di dawîya sala 2007'an û bi mihana hebûna hêzên PKK'ê li Kurdistanê Îraqê û xurtbûna dewleta Kurdistanê, gef û êrîşên berfireh tînin kirin û pir konferans û civînên nepenî û eşkere di

vê derbarê de pêk anîne. Heta kar gihîste cihê ku heyamekê berî niha Generalên Arteşa Turkiyê daxwaza êrîşê bo ser axa Kurdistanê kirin.

Yaşar Buyukanit di hevdiîtanên xwe de li Amerîkayê, helwesta Arteşiyên Turkiyeyê derheq wan pirsên ku me li jor basa wan kir, ji rayedarên Amerîkayê re ragihandibû, lê di axavtînan piştî vegeyriyana xwe ji Amerîkayê, wisa xuya bû ku ew jî weke Ebdula Gul, seba van pirsan destvala û bêdestkevî ji Amerîkayê vegeyriya ye û berpîrsiyarên Amerîkî bal nedane gotin û daxwaziyên wan!

Hilbijartinên îsal li Turkiyê dê pêşeroja wan dijberî û nakokî û pîrsgirêkên navbera van her du desthilat û aliyên Turkiyê dê diyarî bike. Bêguman serkevîna tundrewên nejadperest û şovenîst yê Turk dê vê rewşa nû ya navbera dewleta Turkiyê û Arteşa wî welatî de tundtir û aloztir bike. Ev rewş di qazanc û berjewendiyên aliyekê de nabe û ewlehiya siyasî ya herême dê ji nav bibe û pêrsgirêkan biafirîne. Ji ber ku ew aliyên Turk bi micidî û xurtî dijberiyê tevî pîrsgirêka Kurd bi giştî û nemaze destkevîneteweya Kurd li Kurdistanê Başûr dikin.

Lê renga serkevîna Partiya Edalet û Pêşketinê di hilbijartinan de ku Recep Tevîb Erdoxan rêberiya wê dike, bi van helwestên nerm ên vê dawiyê, alîkariyê bi pêkhatina pêwendiyên di navbera wan û dewleta Kurdistanê Azad ya Îraqê bike. Bêşik heke ew helwest û gotin ji hêla rayedarên dewleta Turk bihên meşandin, dê bandoreke rasterast li ser çareserkirina demokratîk û hemdem ya pîrsa Kurd li Turkiyê û welatên cîran bike. Ev jî bi vê çendê ve girêdayî ye ku partiya han van helwestên xwe xurt û berfirehtir bike û li hember helwesta tundrew ya Generalên Arteşê û hêzên nejadperest teslîm nebe.

Di Bûyereke Dilêşîn De Endamekî PDK Îranê Jiyana Xwe Ji Dest Da

Li gor ragihandina Komîteya PDK Îranê li welatê Norwejê, endamê PDK Îranê yê bi navê **Bextiyar Welezî** naskirî bi Alan, roja şemî, 28.11.1385(17.02.2007)'an, bi sedema lihevdana otombêlan jiyana xwe ji dest da û çû nava refên karwanê Şehîdên gel.

Bextiyarê nemir, tevî 3 endamên din ê PDK Îranê jî bo beşdarî di cîvîneke Komîteya PDK Îranê, li bajarê Bêrgenê ve bo bajarê Osloyê birê ketibû ku mixabin bi hegera lihevdana otombêlan jiyana xwe ji dest da û 3 hevalên wî yê din jî birîndar bûn.

Şehîd Bextiyar, endamekî çalak yê Komîteya PDK Îranê ya bajarê Bêrgenê bû ku nêzî bi deh salan bû li derveyî welat ji bilî birêvebirina erkê partiyê, xwendina xwe jî didomand û îsal sala dawiyê ya xwendina devrana doktoraya wî bû.

Bi vê hincetê, em bi ser navê malbata weşanê ya Ağırî, serxweşiya xwe pêşkêşî malbat û kes û karên **Şehîd Bextiyar** dikin û xwe



di xem û taliya wan de bi şîrkê dizanin.

Rêya wî pir rêvîng û riha wî jî bi bihiştê berîn şad be.

HEMAN NAV Û EXLAQÊ SIYASÎ

Nexweşiyên ku di salên 70 û 80-yî de di nav partî û rêxistinên bakurê Kurdistanê de hebû, niha di nav PDKÎ de rû daye. Gruba ku ji PDKÎ veqetiyaye heman navî bi kar tîne û ev tişteke nebaş e, ne exlaqî ye, ne siyasî ye. Çewtiyên weha berê li bakurê Kurdistanê hatin kirin û tu feydeyê neda doza netewa kurd û herweha tu feydeyê neda tevgera siyasî ya kurd.

Li tevahiya cîhanê pîvan û exlaqê siyasî heye. Divê siyasîvanên kurd jî li gorê pîvanên siyasî û exlaqî tevbigerin. Nabe ku siyasîmedarekî li gor keyfa

dilê xwe hiqûq û exlaqê siyasî binpê bike. Di siyasî de hinek tişt tîne kirin ku ne li gorê exlaq û hiqûqê siyasî ne. Di nav sî salan de tevgera kurd ya bakurê Kurdistanê ji ber nekemilandîbû, bi xesîmî û zarokî gelek şaşiyên kirin. Niha hinek kurdên siyasî yên rojhilatê Kurdistanê şaşiyên ku hatine kirin, dubare dikin.

Hinek kes ji partiyeke veqetin, nabe ku navê wê partiye bîkar binin û herweha nabe ku heman navê organa partiye bi kar binin. Ma nav qeteh bû. Heger dixwazin bibine partî bila naveke nû li partiya xwe daynin. Di salên berê de tevgera siyasî ya kurdên bakur şaşiya bi karînanî heman nav pêkanî û tu feydeyê jê nedît. Ew dem bi navê "Armanç" du kovar, bi navê "Xebat" du kovar derdiketin. Kurdên binxetê herweha bi heman navî du kovar derdixistin. Navê partiyeke du gruban bikar dinanî. Ev jî bi xwe re keşmekeşî, bêserûberê, bêbawerî û nakokî derdixist holê.

Dema ez pê hesiyam ku Kek Hesenazade û hevalên xwe navê PDKÎ û navê organa wê "Kurdistan" bi kar tînin, ez li ber ketim. Sekretê PDK-Î yê ku ji hêla pîvanên exlaqê siyasî û hiqûqî meşru ye anku Kek Mistefa Hicrî di beyana xwe de dibêje: "Rojnâmeya KURDISTAN ku rojnâmeya me ye, wan navê wê danîne ser rojnâmeya xwe. Arma PDK Îranê ji xwe re hilgirtine. Di halekê de ew û gişt xelkê Kurdistanê baş dizanin ku ew PDK Îranê nînin. PDK Îranê ew partî ye ya ku niha di ciyê xwe de ye. Ew partiye ye ku rêberiya wê di kongireyê demokratîk de hatiye hilbijartin. Ew partiye ye ku piraniya rêberiya wê û piraniya bedeneya partiye tevî vê ye. Lewra nabe partiyeke eslî hebe, îca her girûpeke din cuda be, navê wê partiye li ser xwe danê û xwe bi mafdar bizane û ên din jî neheq..... Ez hêvîdar im ku navê xwe biguherin."

Belê, ez jî weke kurdekî welatparêz, weke dostekî 30 salan yê PDKÎ, weke birayekî hemû kurdên rojhilatê hêvî û daxwaz dikim ku gruba Kek Hesenazade di şaşiya xwe de îsrar nekin, û navê xwe biguherînin. Heta dil dixwazê ku ew bi metoda xwerexneyî şaşiyên xwe qebûl bikin û vegerin nav refên partiye.

Li gor pîvanên exlaqî, siyasî û hiqûqî, dema partiyeke bibe ducî, di organa navendî – merkezi – central- de pîvanî kîjan alî be, partî ew alî ye. Ji xwe heger çend kes ji ber sedemên şexsî û yan jî siyasî ji partiyeke veqetin, nabe ku navê wê partiye bîkar binin. Kek Hesenazade û çend kes veqetiyane, heqê wan tune navê partiye û navê organa –weşana navendî – ya partiye bîkar binin.

Ez bi xwe gruba ku ji PDKÎ veqetiyane şaş dibînim û helwesta rêberiya PDKÎ rast dibînim. Divê kurdên rojhilat piştevanîya xwe ji PDK Îranê û rêberiya kongireya 13-ê ya partiye re bidine ragihandin. Partiya serokên nenir Qazî Mihamed, Qasimlo û Şerefkendî bila qels nebe, hîn bêtir xurt bibe, bi hêz bibe.



Lokman Polat

Gerek Kurt Di Dîrokê De ...

Amadekar: Nûredîn Sofizade

16.02.2006: Tekst û arma "TISHKTV" kete ser şaşeya televizyonê û ewa jî hêviya gelê Kurd li Kurdistana Îranê bû.

17.02.1998: Xatûna Mîna Qazî hevîna Pêşewa Qazî Mihemed di temenê 90 saliyê de li bajarê Mehabadê koça dawiyê kir.

18.02.2000: Helbestvanê navdar yê Îranê, Nadir Nadirpûr, koça axiretê kir.

18.02.2001: Siyasetvanê naskirî û endamê Komîteya Navendî ya PDK'ê **Firanso Herîrî** li bajarê Hewlêrê de ji aliyê terorîstan ve kete ber destdirêjiyê û di encam de şehîd bû. Şehîd Firanso Herîrî di eslê xwe de Asurî bû û piraniya temenê xwe bona doza Kurd û Kurdistanê qetandibû.

19.02.1979: Dest bi ser de girtina Padîgana Bajarê Mehabadê ji aliyê PDK Îranê û hevkarîya arteşiyên şoreşvan û welatparêz.

19.02.1980: Pêkhatina kongireya 4'an ya PDK Îranê li bajarê Mehabadê de bi pişikdariya 310 kes ji nûneran. Piştî 34 salan eva yekemîn kongireya eşkere bû ku ji aliyê PDK Îranê dihatê birêvebirinê.

20.02.1980: Destpêkirina şer li deverên bajarê Kamyaranê û êrişa hêzên cinayetkar ên rejîma Komara Îslamî a Îranê bo ser piraniya deverên Kurdistanê ku piştê bû şer di gişt Kurdistanê de.

20.02.2005: Avabûna **Kongireya Neteweyê Îrana Federal**, ku tê de piraniya partî û rêxistinên nûner ên nateweyên Îranê beşdar bûn. Diyar e ev yeka bi cehd û tekoşîna çendîn salî ya PDK Îranê pêk hat.

21.02.1947: Lidarvekirina 12 kes ji xebatkarên PDK Îranê li bajarê Bokan û Seqizê de.

21.02.1984: Li navbera binkeyên "Girdeben" û "Gireziwe" a devara bajarê Şinoyê Pêşmergeyên PDK Îranê ji hêza Simko, ketne nava telika hêzên rejîmê û li encama şereke giran de mixabin 4 Pêşmerge bi navên: Xalid Îbrahîmî, Rehîm Samedpûr, Zîrar Mamedî û Ehmed Ezîzî şahîd bûn.

21.02.1984: Hêzên rejîmî ji gişt aliyên ve êriş kirine ser gundên "Gulolan" û "Tirsan" a devara bajarê Mehabadê û tevî berevaniya Pêşmergeyên PDK Îranê hember bûn. Piştî şereke giran ku têde 10 kes ji hêzên rejîmê hatne kuştin, mixabin 5 Pêşmergeyên PDK Îranê bi navên: Mihemed Mamrehîmî, Rehaman Rengîn, Cefer Rengîn, Qadir Barane û Kekê Omîd şehîd bûn.

21.02.1999: Roja Cîhanê ya Zîmanê Zîkmakî.

22.02.1991: Nivîskar û helbestvanê navdar ê Kurd **Mamosta Hejar** koça dawiyê kir.

22.02.1999: Kuştina xwenîşandanên bajarên Kurdistana Îranê, weke Sîne, Urmiye, Mehabad û ... ku pitir ji 20 kesan şehîd bûn û bi sedan kes hatne girtin û ketne girtîgehan.

22.02.1922: Welatê Misr ku heya wê demê di bin destê welatê Firansayê de bû, karî serxwebûna xwe bidestve bîne û bibe dewlet.

23.02.1918: Simkoyê Şîkak rêberê Asûriyan anku Marşîmon kuşt. Bi vî terzî şereke giran di navbera Asûrî û Kurdan ve li herêma bajarê Urmîyê pêk hat û piştî wê demê Asûriyan weke neyar çav ji Kurdan dikirin.

24.02.1923: Simkoyê Şîkak tevî 400 siwarên xwe gihîste bajarê Silêmaniyê û ji aliyê Şêx Mehmûd ve bi germî hate pêşwazîkirinê. Egera çûna Simko bo bajarê Silêmaniyê dîtin û pêkanîna pêwendiyên tevî Îngilîziyan li Bexdayê bû.

27.02.1980: Piştî wê ku kongireya 4'an a PDK Îranê nameyek ji bo Benîsedir, Serok Komarê Îslamî yê wê demê yê Îranê şand û daxwaza hevdîtinekê tevî şanda PDK Îranê li ser doza Kurd kiribû, piştî qebûlîkirina vê daxwazê şandek ji aliyê PDK Îranê ku pêkhatibûn ji Xenî Bilûriyan, Ebdula Hesenazade, Fevziye Qazî, Nevîd Moînî û Ehmed Qazî ber bi Tehranê ve rêketin û tevî Benîsedir rûniştin pêk anîn. Di vê hevdîtînê de Daryûş Firûher, Haşim Sebaxiyan û Îzetulah Sehabî jî pişikdar bûn. Ev rûniştina bê encam ma.

28.02.1983: Hêzên cinayetka yê rejîma Îranê li dirêjahiya cinayetên xwe de êriş kirine ser 5 gundên derdora bajarê Nexedê û xelkê sivil xistin ber destdirêjiya guleyan û mixabin di encama vê kiriyara hovane ya rejîma Îranê de pitir ji 40 kesên bêguneh di wan 5 gundan de hatne kuştin.

Rewşa Zarokan Li Îranê De

Amadekar: Hemîd Muxtarî

Ez dixwazim berê ku balê bikişînim ser rewşa zarokên Îranê, îşareyekê bi çend madeyên girîng ên Peymannameya Cihanî a Mafê Zarokan bikim.

Peymannameya Cihanî a Mafê Zarokan, peymannameyeke navnetewî ye ku ji bo berevanîkirinê ji mafê zarokan di sala 1989'an a zayînê de hate pejirandin û di sala 1990'an de hate birêvebirin. Niha jî di nava 193 welatên cihanê de, 191 welat endamê vê Peymannameyê ne ku yek ji wan welatan welatê Îranê ye.

Ev peymannameye ji destpek û 54 madeyan pêk hatîye ku emê li vir de îşare bi çend madeyên wê yê girîng bikin.

Madeya 15

Man û Pêşkevîtin: Her zarokê xwediyê mafê xwezayî yê jiyane ye û divê dewlet jiyan, man û pêşkevîtinê zarokan garantî bike.

Madeya 24

Xizmetên Saxlemiyê: Mafê zarokan e ku bibin xwediyê radeya herî bilind ya saxlemiyê û xizmetên nûjariyê. Gereke dewlet baleke taybetî bidin xurtkirin, parastin û hînîkirinê giştî yê saxlemiyê.

Madeya 27

Radeya Jiyanê: Her zarokê mafê jiyanê wiha heye ku di warê cendekî, hiş, hundirî û civakî de geşê bistîne.

Madeya 28

Hînîkirin û Perwerde: Perwerdehî û hînîkirin mafê her zarokê ye û divê dewlet îmkana perwerdehiya destpêkî ya belaş û bi zorî bo hemûyan misoger bike.

Madeya 29

Hînîkirina buhagiraniyan: Armanç ji hînîkirin û perwerdehiyê divê geşekirina kesayetiye û şiyane zarokan bi awayê herî baş be û zarokan bo jiyanê çalak di civakê de berhev bike.

Madeya 30

Zarokên kêmaniyên neteweyî û mesebî: Zarokên kêmaniyên neteweyî û mesebî mafê wê çendê hene ku bibin xwediyê çanda xwe, karên mesebî ên xwe bicî binin û bi zimanê xwe biaxivin.

Madeyas 33

Mewada muxedîr (sirker): Zarok divê li hember mifahwergirtinê ji madeyên hişber (sirker) û beşdarî di çêkirin û belavkirina wê de werin parastin.

Madeya 37

Qedexkirina îşkenceyê: Tu zarokê nabe bikeve bin îşkenceyê, riftarên zalimane û girtinên neyasayî. Dasepandina cezayên îdamê û hepsa hertimî divê derheq zarokan de nemîne û bihê hilgirtin û zaf madeyên din ku em li vir nikarin îşarê bi hemûyan bikin.

Li vir pirsîyarekê tê holê: Erê gelo rejîma Îranê jî ku ev peymannameye îmza kiriye tu gaveke erîni derheq birêvebirina madeyên wê peymannameyê avêtîye?! Ger birêve nabe, çima bûye endamê?!

Bersiv rohn û eşkere ye, divê were gotin ku rûçik û hundirê rejîma Komara Îslamî a Îranê tevî hev gelek ferq û cudahî hene, rejîm

bi îmkazirina wê peymannameyê dixwaze bi terzekê xwe bi cihanê bide nasandin ku rejîmeke gellî ye û xwe li hember giştî nifûsa Îranê berpîrs dizane. Lê di rastî de pejirandin û birêvebirin du tiştên ji hev cuda ne. Ev siyasete li mêjdeme ku rejîma Îranê bo xapandina raya giştî a cihanê birêve dibe û di vê pêwendiyê de gelek mînakên din jî hene ku rejîma Îranê di nava yasaya bingehîn a xwe de cî kirîne bo mînak.

Esla 15'an ya yasaya bingehîn a rejîmê derheq hebûna heqê xwendin û nivîsandinê bi zimanê zigmakî bo hemû gelên Îranê, lê piştî derbazbûna pitir ji 28 salan heya niha jî neketiye qonaxa çêbûkirinê. Yan esla 19'an ku wekhevîbûna hemê gelên Îranê bê liberçavgiirtina nejad, reng, ziman, ol û...hwd,



Xurasan, Tehran, Loristan û Kurdistanê de ne. Navhatî sedema pêkhatina wê diyardeyê di Îrane de vedigerîne bo zêdebûn û guhertinên bê rêje yê nifûsa Îranê, kavilbûn û xirabiyên bi cî mayî ji şer, feqra çandî, koçkirin, bêkarî, zêdebûna astê telakê, Îtiyad, hebûna karên nerast û ne yasayî di Îranê de.

Herwiha li ser rewşa saxlemiya

qebûl kiriye. Lê heke me lênihîrênek li ser ji rewşa aborî, siyasî û civakî ya neteweyên Îranê, bixasmanî neteweya kurd hebe, mere eyan dibe ku rejîm di vî warê de heya çî qasekê xwe bi berpîrs zaniye. Yan esla 23'an ku tede pêşgirtin ji eyankirina bîr û rayan mehkûm dike û dibêje hemû kes dikare bi azadî bîr û rayên xwe eyan bike û nabe tu kesekê seba wê yekê bixine bin zext û givaşan.

Lê bi rastî di kiryar de ev yekê jî cî bi cî kiriye?! Ger wisan e çima rejîma Îranê her salê ji aliyê rexistinê navneteweyî û sazîyên "NGO" ye weke yekemîn welatê tepeserker di warê bergirtinê ji azadiya bîr û rayan tê hesibandin û mehkûm kirin.

Rejîma Îranê her weke mînakên sere ku me îşare pêkir serbarê wê çendê ku derheq soz û peymanên xwe li hember liberçavgiirtina mafê zarokan dirûşman dide, lê di kiryar de daliqandina keç û xortên biçûk û jêr 18 saliyê bi awayekî berfireh birêve dibe ku wê yekê bi awayeke rasterast tevî madeya 37'an a Peymannameya Cihanî ya Mafê Zarokan dijberî heye.

Ger em lênihîrênekê li ser rewşa giştî xelkê û bi xasmanî zarokan di Îranê de li gor wan serhijmariyên ku ji aliyê sazîyên girêdayî bi rejîmê yan li gor gotinên berpîrsên rejîmê bikin, berpîrsiyariya rejîmê li hember xelkê Îranê ji me re eyan dibe! Bo mînak li gor nûçegehaniya "Kar" ya Îranê, birêveberê giştî yê deftera jêrdeanîna xizani û siyasatên

qerebû kirinê a Wezaretê Rifah (Rahetiye), ragihand: "Li gor serhijmariyan pitir ji 12 milyon ji xelkê Îranê di belengaziyeke tevav de dijîn".

Li gor gotinên birêz Emîni, belengaziya xurt û kesên ku ji destê birçibûnê dinalin, pitir ji yek milyon kesan e. Wî sedema bingehîn ya belengaziye di Îranê de nebûna xwendewarî û herwiha nebûna piştewaniyê ji kesên destkurt zani.

Herwiha yek ji alîkarên civakî û endama zanistî ya zanîngehê bi navê Dr. "Xunçe Rahib" di hevpeyivînekê de tevî Nûçegehane Xwendekarên Îranê (ISNA)ê de dibêje: "%80 ji zarokên ser şeqaman ên Îranê zarokên karî ne û heke dest ji karê xwe berdin, dê malbata wan tevî pîrsgirêkên zaf di warê miaşê de berbirû bin, lewma komkirin û ji navbirina karê zarokên ser şeqaman nikare pîrsgirêkên wan çareser bike". Wê herwiha got ku pîraniya zarokên ser şeqaman di parêzgehên

zarokên serşeqaman di Îranê de Koma Civakî a ser bi Nûçegehaniya Xwendekarên Îranê (ISNA)ê, lêkolînek li ser 4133 kes ji zarokên ser şeqaman kiriye ku di vê lêkolînê de %73 ji zarokan tûşî nexweşiyên çav, %61 nexweşiyên bêhn tengiyê, %64 tûşî nexweşiyên dil,%69'ê wan pîrsgirêkên bihistinê û %61 ji kêmasiya baldanê dinalin û %82 jî tûşî nexweşiyên çerm hatine. Di warê xwendewariyê de jî %56 nexwendewar,%61 bi başî nikarin biaxivin û bi giştî %86 ji wan ne xwediyê pisporiyê di warê kar de ne. Ev serhijmariye eyankerê rewşa nebaş a zarokan di Îranê de ye.

Giştî xwedî hizr di vê pêwendiyê de li ser wê baweriyê ne ku ji bo kêmkirin û jinavbirina wê diyardeyê hewce ye ku rewş û zirûfek were pêkanîn ku zarokên ser şeqaman him bikarin di ciheke paqij û salim de kar bikin û him ji xwendina xwe bidomînin. Di vê navberê de divê damezirandina kargehên jêhatî û perwerdehiya pisporiyê a zarokan di rêza yekemîn de be ku pêkanîna wan derfet û delîvane tenê ji dest dewleteke berpîrsyar tê encam dan û rejîma Komara Îslamî a Îranê ne xwediyê wê taybetmendiyê ye.

Email: agirî_kurd@yahoo.com

Jêder:

1:Yasaya Bingehîn ya rejîma Komara Îslamî a Îranê.

Komkirin: Şehram Soltanî Lorganî

2: Rojnameya Agirî hejmar 27,29,30.

3. Malpera www.roshangari.net – www.radiobalochi.org.

Daxuyaniya Komêk Ji Çalakên Medenî û Alîgirên Mafên Mirovan Li Kurdistanê Derheq Pirsgirêka Mayînan

Teqîna mayînan û telikên mayînan ên bicîmayî ji dema şerê Îran û Îraqê, yek ji pirs û kirizên îroyîn ên civaka me ye ku zêdebarê derbazbûna 18 salan bi ser şerê Îran û Îraqê heya niha jî hevvelatiyên parêzgehên Kurdakincî tevî wê arîşê berbirû ne.

Derbazbûna mideheke zaf li ser çandina mayînan û herwisan rewşa cuxrafiyayî û rewşa av û hevayê Kurdistanê, ku bi giştî bûye sebêbê cî bi cî bûn û li ser ciyê xwe nemana mayînan, pirsgirêk du qat berfirehtir kiriye ku hewcehiya girîngîpêdanê zêdetir û bingeîn ji aliyê berpirsan ra dixwaze.

Ji aliyê hebûna bi milyon mayînan çandî di herêma parêzgehên Kurdistanê de bûye sebêbê kêmbûna astê ewlehiya jiyana, ruhî û aborî a xelkê Kurdistanê û ji aliyê din ve seba ji nav neçûn û girîngî nedana

dewletê bi mayînan çandî, zêdebarê pêkhatina pirsgirêkên zaf ên jîngehê, weke belgeyê rastîn ya binpêkirina mafê hevvelatiyan tê hesabandinê.

Li gor serhejmariya weşandî ji aliyê Rêxistina Neteweyên Yekbûyî, 16, 000, 000 mayînan çandî di Îranê de hene û bi awayekî navincî goriyên mayînan di her rojekê de 2/2 e ku bêşik pitir ji %70 ya



vê serhejmariyê girêdayî bi herêmên Kurdakincî ye, bi awayekê ku jiyana sedana kesan jê standiyê û bi hezaran kesan jî endamên laşê/a xwe bi vê egerê ji dest dane.

Eva di halekê de ye ku li gor yasaya bingeîn a rejîmê, berpirsiyariya parastina can û malê hevvelatiyan bi awayekî rasterast li stûyê hikûmetê û serveyî hemûyan li stûyê dewleta Îranê ye. Lê zêdebarê eyankirina nerazîbûnê ji aliyê hevvelatiyan û sazîyên sivil û parêzvanên mafê mirovan, heya niha jî ne tenê tu gaweke erênî di vê derheqê de nehatiye avêtin, belku gelek ji kiryar û bernameyên ragehandî û pejirandî ji aliyê dewleta Îranê ve di çarçoveya leyistînan siyasî û jêstên siyasî ên berpirsan di astê dirûşman de maye, eva di halekê de ye ku ev dijminê veşartî anku mayînan her rojê û her demê canê hevvelatiyekê digire yan dest û pêyê mirovan jê vedike.

Seba vê yekê, em weke komêk ji çalakên medenî û berevankarên mafên mirovan bi îmkîna vî daxuyaniyê

daxwazê ji berpirsên dewleta Îranê dikin ku bona ji navbirin û paqijkirina meydanên mayînan gavên erênî bavêjin û ji bo serkevtin di vê pirosesê de, em xalên jêrîn bi hewce dizanin û daxwazkarê cî bi cî kirina van xalane in.

1. Pêkanîna komîteyêke taybet û pispor derheq çareserkirina pirsgirêka mezin ya meydanên mayînan li parêzgehên Azerbaycana Rojava, Îlam, Kirmaşan û Kurdistanê.

2. Pejirandin û diyarîkirina budceyêke baş bona çareserkirina pirsgirêka han.

3. Venasîna herêmên mayînrêjîrî û aghdarkirina hevvelatiyan ji rêyên pêwîst.

4. Encamdana bilez derheq komkirin û paqijkirina herêmên mayînrêjîrî û telikên mayînan, bi xasmanî li herêmên jiyane, nemaze ev binkeyên leşkerî ên valabûyî.

5. Dayîna îcazenameyan bi awayekî bilez ji bo avakirina sazîyên nedewletî ên çeleng derheq pirsgirêka mayînan û herwisa cî bi cî kirina kereseyên hewce ji bo kesên ku bi dilxwaz daxwaza hevkarîyê di vê pêwendiyê de di çarçoveya civat û sazîyên nedewletî dikin.

6. Hewce ye dewlet ji bo pêşgirtin ji cî bi cî bûna mayînan çandî û serevjêr bûna wan bo herêmên akincîbûnê, çêrîngeh, rê, erd û zeviyan cotkariyê, bi pirojeyên weke çêkirina nîşaneyên destçêkirî û kanalkişandinê, gavan hilgirin û di vê derheqê de bernameyên bingeîn birêve bibe.

7. Hewce ye ku pêrêgehîştin û girîngiyêke taybet bidin bo kesên ku dibine gorîyê wan mayînan çandî ku piraniya wan bi egera ketine ser mayînan şiyana karkirinê tuninin û hewcehiya bi piştevaniya aborî hene û pêwîst e ku hemû binkeyên berpirs di vê derheqê de destê wan bigirin.

8. Bi girîngîdan bi vê yekê ku zaf herêmên Îranê ji herêmên şer û ne şer bi dirêjahiya salên borî hatine mayînrêjîrîn û

herwisa ji bo pêşgirtin û paqijkirina wan meydanên mayînan pêwîstî bi bûdceyê zaf heye, lewra em daxwazê ji rejîma Komara Îslamî ya Îranê dikin ku tevî welatên endam di Peymannameya Navneteweyî ya "Otawa"ê bibe û bi wan re alîkariyê bike.

17.02.2007

Navê îmzakarên daxuyaniyê:

1. Mihemedsidîq Kebûdvend, 2. Îclal Qewamî, 3. Omîd Bêygîzade, 4. Saman Resûlpûr, 5. Zeyneb Bayezîdî, 6. Celal Hacîzade, 7. Rehmet Şexsî, 8. Keywan Ferehmendî, 9. Şehabedîn Şêxî, 10. Qasim Ehmedî, 11. Seîd Saêdî, 12. Qehreman Kerîmî, 13. Fuad Senetî, 14. Behram Weledbêygi, 15. Husên Ehmedî, 16. Hoşeng Mihemedî, 17. Toniya Kebûdvend, 18. Elî Bijefer, 19. Seyêd Hidayet Haşîmî, 20. Mihemed Dawer, 21. Îsmail Canî, 22.

Xalend Mehmûdiyan, 23. Mesûd Bînenê, 24. Bêhzad Xoşhalî, 25. Emin Surxabî, 26. Emîr Ebdulahî, 27. Omîd Ehmedzade, 28. Mistefa Ehmedzade, 29. Tahir Xediw, 30. Fuad Lutfîfer, 31. Yûnis Qurbanîfer, 32. Awat Barîkiyan, 33. Sirwan Sedî, 34. Îbrahîm Qurbanî, 35. Hamid Çavşîni, 36. Dr. Fireydûn Nûrî, 37. Elî Rezaxanî, 38. Kiyûmers Xizlî, 39. Hesên Ezîzî, 40. Rehîm Wahidî, 41. Ebdula Dilşad, 42. Hesên Selahsorî, 43. Cemşîd Mizferî, 44. Mistefa Sawe, 45. Fazil Welîyan, 46. Hidayet

Welîyan, 47. Esedula Mihemedî, 48. Azad Hacîaqayî, 49. Ferheng Soltanî, 50. Mihemed Kemanger, 51. Selahedîn Xediw, 52. Selah Çelbiyanî, 53. Sedûn Mazoçî, 54. Ebdulezîz Mulûdî, 55. Şefî Behramîyan, 56. Mulûd Behramîyan, 57. Ezîz Îbrahîmî, 58. Hamid Ferazî, 59. Moslêh Tohidî, 60. Xosrew Kurdpûr, 61. Mesûd Kurdpûr, 62. Dr. Hesên Şêxaqayî, 63. Mehmûd Pidram, 64. Mihemed Şêrko Hesênûr, 65. Mihemed Bayezîdî.

Agehdarî!

Xwendevanên hêja!

Di çend hejmarên berê yên Agirî de, me nivîsarek li jêr navê "cudabûnên nava refên PDK Îranê de, sedem û encamên wan" weşand, mixabin ji ber hinek sedeman em nikarin du beşên mayî yên nivîsarê biweşînin. Li me biborin. Lê hûn dikarin li ser malpera me beşên mayî yên gotara han bixwînin.

**Rêz û hurmet
Desteya Weşan ya Agirî**

Îbrahîm Newrozî Naskirî Bi Birê Stiranbêjê Bi Nav Û Deng Yê Serhedê

Mihemedsalih Qadirî

Ger em bi çavê vekirî bera xwe bidene vê rastiyê ku piraniya stiran û stiranbêjên navdar ên Kurdan ji

hêla Serhedê we serhildane, vê bo me eyan bibe ku sebaba vê yekê vedigere bo wan bûyer û oxirmeyên ku li devera Serheda Kurdistanê de bi serê Kurdan ve hatine. Eva jî bûye sedema vê hindê ku jin û mêrên bi hest yê Kurd ên vê deverê wan serpêhatiyên bi dengê zelal ê xwe bilorînin û bi stiranên xwe kul û keserên jiyana zordestiyê birêjin û dilê birîndar ji derbên



Kêla Nemir Hunermend Birê

dijmînan û hês û agirê hunera xwe pê hênîk bikin. Lewra em dikarin bibêjin stiran ji bo Kurdên Serhedê bûye heval, hevsem û penageha tenahiyê. Bi gotineke din serca riha stiranbêjiya Kurdî li mêj ve ye li dayîk bûye.

Mînaka wan stiranbêjên naskirî yên Serhedê wek: **Tahro, Şekro, Reso, Sidîqo, Hacî Ebdulkerîm, Şeroyê Biro, Birê, Qado**, ... ku bi xasmaniya dengbêjiya xwe bûne xweşteviyê xelkê Kurdistanê û neynûka bejn xuya ya êş û janên gel dane ber çavê her guhdarekê.

Îbrahîm Newrozî (Birê) kurê Mistê ji malbateke welatparêz û naskirî yê Kurdistana Îranê ye. Mistê babê Birê yek ji wan serkirde û egîd û jêhatiyê serdemê şoreşa Cever Axa û Îsmâil Axayê Şikak bû. Mistê ev kese bû ku tevî Cever Axa çû bo Tevrêzê û piştî şehîdkirina namirovane ya Cever Axa bi destê kesên nenaskirî, wî karî tevî 6 hevalên xwe bi berxwedaniyê qehremanane, xwe ji pîlana dijmin rizgar bikin û veqerine Kela Çehrîqê.

Birê sala 1307 (1928)an li gundê Bawan ya Somayê ji dayîk bû, di temenê 10 saliyê de bûye hogirê helbest û lavjegotin û ji vê demê ve heya sala 1378 (1999)an, sala ku di temenê 71 saliyê de çû ber dilovaniya Xudê, berdewamî da karê hunerî û xebat bo rizgariya welat.

Deng û stiranên **Birê** li dûr ve bêhn û dengê Kurdîniyê jê tî. Dema ku kilamên serpêhatî û belengaziya Kurda dilorîne, her

guhdarkê dixê ber bandoreke kûr û mirov dibe bo şax û dema berê û bab û kalên me tîne bîra me.

Xasmaniya kilambêjiya Birê ku çî peyv ya meqamên biyanî tevî stiranên xwe nekirine û ev hemû stiranên xwe bi çand, folklor û zimanê zelal û esîl yê Kurdî darêtine. Wî peyvên Kurdî bi zelalî û fesîhî bê ser û pê birin di kilamên xwe de stirandiye, lewra dibînin ku stiranên Birê xwediyê xasmaniya xwe ne. Stiranên Birê bas ji belengazî, xerîbî, egîdî, evîndarê bedevê û xwezîya Kurd û Kurdistanê dikin.

Deng û lavjê Birê wekî kilîdekê bûn ku zimanê şîrîn û qedexekirî yê Kurdî pê dihate vekirin. Lavjên Birê bi qasekî bandor li ser mirov didanê ku ger mirov çiqas jî newêrek ba, bi bihîstina lavjên şoreşgerî yên Birê mirov dilêr dibû. Yan mirovên pîr bi bihîstina lavjên evîndariyê wek xortên 14 salî lêdihatin. Lewra em dikarin bêjin ku Birê di çaxê xwe de wek stêrekî geş yê kilambêjiya Kurdî hatiye naskirin.

Ji ber ku lavjên Birê wek dîroka nenivîsî, dikarin gelek bûyer û serpêhatiyên mezin yê jiyana û dîroka gelê Kurd bidene eyankirin.

Her lavjeyê Birê wek gul û rihaneke ye ku sîng û berê çiya û çol û newalên Kurdistanê pê dixemlînin û evîndarên dengê wî pê dilgerm û serxweş dibin. Birê di jiyana hunerî ya xwe de zêdetir ji 400 lavje stiriye ku piraniya wan bê muzîk hatine gotin.


Birê çend salan di **Radyoya Kurdî ya Urmîyê** de lavje gotine, lê piştî gotina lavja



Dîmenek ji gundê Îbrahîm Newrozî (Bawan)

Îran e xweş Îran e ku sînorê Kurdistanê diyarî kiriye ji radyoyê hatiye derêxistin û bo heyamê 5 salan ketiye girtîgehê û hatiye binçavkirinê.

Her çend ku Birê bi sebaba jiyana bindestiyê nekarî hemû êş û janên gelê



Hunermend Îbrahîm Newrozî (Birê)

Kurd wekî hisrekeke mezin ku di dilê wî de pangorî bûn, bi dengê zelal û nerm yê xwe der bike, lê hunera Birê wek gencîneyekê dest lênedayî bo hunermend û gelê Kurd bi mîrat maye.

Birê yek ji wan kilambêjên bêminak bû ku mil bi milê xebata hunerî di meydana xebata neteweyî de wek Pêşmerge û şervanekî azadiyê dixebitî. Wî nemirî piştî çend sal Pêşmergeyatiyê bi sedema kalbûnê bi neçarî bera xwe da jiyana xerîbiyê û bo heyamê çend salan li Turkiyê bû koçber, lê li wir jî kete ber derbeya dijmînan û bi çend guleyan birîndar bû.

Piştî vegeryan bo nav xizm û kesên xwe ku êdî nesax û pîr bibû, lê dîsan jî weke endamekî bi emeg yê PDK Îranê heta roja mirinê ji xebata siyasî dest ber neda.

Birê evîndarê bedevî, tebayî û azadiyê bû. Lewra wek kesayetiyekekî xwedî qedr û qîmet û xwedî merîfet di nava civatên xelkê Serhedê de rêz û hurmetekî xasmanî hebû.


Hewce ye ku şîrît û berhemên hunerî yên Birê ji aliyê dezgehên çandî û

xemxorên hunera kilasîk ya Kurdî ve bêne komkirin û lêkolînek dîrokî, çandî û civakî jê bihê kirin û di encam de berhemeke nivîskî û peykerekê hunerî jê bihê çêkirinê.

Riha wî şad û cihe wî beheşt be.

DURISTÎ

ADAR JIYAN
adarjiyan@mynet.com



Her tégînek li gorî bikaranîna xwe û her bikaranînek jî li gorî tégîna xwe watedar dibe. Belê mixabin her gav her tişt li dewsa xwe, li ser a xwe û li sêra xwe namîne. Gelek tişt li gorî nêrîn û feraseta mirov diguherin, dişewin û dirûv digirin. Ango hin tişt hin caran bi destê mirov nixdar û manîdar û hin caran jî talan û wêran dibin.

Çi dibe bila bibe, her heyîn bi dijberê xwe re dijî û li ser piyan dimîne. Û her dijber jî bi dijminê xwe re di nav şer û pevçûneke domdar de ye. Belê hemû hebûn û heyînên ku li hemberî hev û din şer dikin; hin jê xwediye taybetiyên erênî û hin jê jî xwediye taybetiyên neyînî ne. Taybetiyên erênî xwezayî û yên neyînî çêkirî ne. Taybetiyên xwezayî bi her mirovî/ê re peyde dibin; belê yên çêkirî paşê bi mirov re digihên. Em ê jî di vê kurtenivîsê de li ser du tégînan dijber û dijwate yên ku di jiyana mirov de pevce dijîn û pev diçin, rawestin. Ew jî; yek jê duristî û ya din jî durûtî ye.

Duristî jî di nav de, îro gelek kirû û tégînan girîng, digel wate û bikaranîna xwe hatine mehandin, lewitandin û çilvirandin. Digel hemû neyînî û nebaşiyên, îro nixê ku her kes dikare bi piştrastî lê xwedî derbikeve û bi hêsayî wê biparêze, dîsa duristî ye. Duristî, ji do heta îro ji hêla her kesî ve wekî pîvanga û pileya qencî û dilpakîyê hatiye/tê dîtin û parastin. Her wiha ew, her gav wekî hêjahîyeke hevbeş û erênî ya tevê mirovahîyê hatiye/tê ecibandin û pejaran din.

Dursitî, çeqa hemû erênî, xweşbînî û başiyên mirovahîyê ye. Duristî qedirşinasî, payeberzî, mezinayî, gewreyî, rûmetdarî, firazwerî, ewlemendî û serbilindî ye. Û hemû nix û hêjahiyên mirovî li ser vî esasî hatine/têne avakirin. Heke duristî tunebûna, dê îro destketina van nix û hêjahiyên jî tune bûna. Belê duristî çiyê; wate û bikaranîna wê ya rastîn çawa ye; li ku û çawa tê bikaranîn; divê mirov bi dorfirehî li ser vê yekê raweste û hinekî serê xwe biêşîne.

Duristî, di wateteyêke teng û bi ser re de wekî lihevî, ahengdarî, bixweewleyî û ewlemendî tê binavkirin. Di vir de tu pirsgirêk nîn e. Û ev yek jî ji hêla her kesî ve bêşik û bêniqas tê qebûlkirin. Belê pirsgirêka mezin û giran, nakokîya navbera watedarkirin û bikaranîna duristiyê ye.

Ango parastin û nelihêvbûna wê, dibe sedema gelek û alozî têkeliyên tund û dijwar. Bi vê nelihêviyê re, gelek kêşe û arîşeyên domdar û rûxîner derdikevin holê. Digel van arîşeyan, di nav dil û mêjiyê mirovan de hest û hizirînên erênî û neyînî jî aj didin. Êdî ev yek jî dibe despêka şerê navbera duristî û durûtîyê.

Duristî, pirêzeya qencyê, belê durûtî bizrê xerabiyê ye. Duristî, kana hestên firştehî belê durûtî, maka hizirînên îblîsî ye. Duristî, wekî kevokeke aşîreng, mirov ber bi asîmanê hêşîn de vedike. Belê durûtî wekî marê di tûr de ye. Bêdeng bi mirov vedide; dixurice û diçe. Li pey xwe tenê cesteke bêhest û bêruh dihêle.

Duristî û durûtî du kirûyên pozber in. Hebûna yekê girêdayî tunebûna ya din e. Her wiha serketina yekê bi binketina ya din ve girêdayî ye. Herdu jî li hemberî hev û din şerekî bidom û bêdeman dikûdînin.

Şerê navbera duristî û durûtîyê, ji do heta îro bêtebat û bêdeman didome. Tiştê ku di nav dil û mêjiyê mirovan de tofanê radike jî ev şer e. Di vî şerî de hin caran hest û hizirînên erênî û hin caran jî yên neyînî bi ser dikevin. Hin caran jî hest û ramînen reşbîn raselîtî ser dil û mêjiyê mirov dibin. Hin caran hest û bestên erênî, bi awayekî eşkere di nav dil û hinavên mirov de dilivîn û mirov arasteyî bizav û tevgerên fedakar û wefakar dikin. Hin caran jî durûtî, wekî dijminekî hundirîn di nepenîya jiyandê de bi nermovingîyeke konedar, bi mirov re hasil dibe. Hin caran duristî wekî pinpinîkeke berî û bêrî; mirov li ser baskên xwe dike û ber bi gul û kulîlkên xêrxawaziyê de difire. Hin caran jî durûtî wekî nexweşîyeke heftpençe di dil û mêjî û mirov de diçêre.

Gotina dawî, şerê navbera duristî û durûtîyê ne şerekî jirêzê, ketberê û demdemî ye. Şerekî misêwa, domdar û mayînde ye. Heke, di vî şerî de hest û hizirînên erênî di hawara mirov de bêt û xwe bidin bi çengê mirov, dê durûtî li duristiyê dagere û serketin bibe para mirov. Na, heke hest û hizirînên neyînî di dil û mêjiyê mirov de biçêrin, dê wê çaxê duristî li durûtîyê bihesile û mirov bibe para binketîne.

George Berkeley dibêje: "Kesekî/e ku ji we re bibêje mirovên durist nîn in" bawer bikin ku yê/ya ne durist ew kes bi xwe ye."

Kaniya Helbestan

Balqîs

Nîzar Qebanî
Werger: Îbrahîm Îbrahîm

I.
Sipasiya we dikim
Yara min hate kuştin
Hûn dikarin piyalek mey li ser gora wê vexwin...!!
Helbesta min mir
Hûn dizanin ...?
Ji Ereban kes nîne helbestan dikeje ...!!

Belqîs (1)...
Gula dîroka Babil bû
Darek bilind bû di zemîna Îraqê de
Gava dimeşî, dorhêl ji tawûsan dixemlî
û xezal li pey wê dimeşin

Belqîs
Êşa min
Êşa helbestan
Di pey te re şînayî serî hilnîne
Tu keskahiya Nînewayî yî
Tu goçera min î
Pelên ava Dicle yî
Xilxala xweşik di lingê Te de ye

Tu kuştin Belqîs...!!!!
Ev çê rengê EREBAN E
Dengê Bibalan dikujin...!!!!
Kani Seme'ewl...??
Kani El-muhelhel...??
II.

Ê! .. êlan dixwin
Rovî roviyan dikujin
Piliidîr pilindiran şerjêdikin
Bi navê çavên te, yên ku di wan de rûniştîye
Ezê li ser Ereban tiştên ku nehatine gotin bêjim.
Derew li ba wan lehengî ye...!!
Dîroka wan, wek wan derew e...!!!

Belqîs!!!!!!
Ji ber çavên min nare
Roj nema derkeve Belqîs
Li ser erdê dinê
Ezê di dadegehê de bêjim
Leşker bûn diz
Serok bûn bazirgan
û....
çîroka „medem“ korî
bû çîrokek qirêj
em êlek di nav êlan de ne
dîrok ev e BELQÎS.....!!!!!!

III
Belqîs....
Helbesta min...şehîda min
Zelala min
Sebe'ê li şahensahiya xwe digere
çima tu şilavê vanagerîni li millet...??
tu şahensahiya mezin î
gelek demsalên "Sumerî" di ser te re çûne
Belqîs civîna mine xweşik e
Cigara min e
Histirên li ser rûyê Mecdeliyê belav bûne
Belqîs...
Rojekê ez te dikim bin stemkariyê
Gava te dikujin li ber ava E'zemiye
Beyrût...
Her rojekê yekî ji me dikeje
û roja din li yekî din digere

mirin tim li ba me ye
Di fîncana qehwa me de ye
Di kilîta mala me de ye
û
Di kulîlkên me de ye
û....
Di belavok û tîpên me de ye.

(1) Ev helbesta bi navê «Belqîs» ya helbestvanê Erebanî mezin Nîzar Qebanî ye; min ew wergerandîye kurdî. Belqîs navê pîreka wî ye, ku li Beyrûtê hate kuştin

Roja mirinê

Serbest Urmiye
Serbesturmiye@hotmail.com

Ger rojekê
li ser vê axa bê xwedî
Girtin pêlên behra mirinê
Dîmenê jiyânê li min
Di çembereya çiyayên bê day û bab de
Ger rojekê
Kutan perên xwe melekê mirinê û
Li min girtin sîbera goristanê
Nizarên temen
Ger rojekê te dît ku
bi ser serê min de,
Bilind bû
Dengê elah û ekbera Melayê gund,
Wê demê
Were cem min û
Bigre min di hembêza xwe de
Bila
Bimrim tenê di hembêza te de ez
Da ku nebînin
Ji lorîkê di çava de zahabûyî hêsir
Xêncî te
Kes, derya hêsirên xerîbiyê
Bi ser rûmetê min ê mirî de
Bila bibarin
Dilop, dilop hêsirên rehma te bi tenê
Bila
Tirba min ê bêpar ji evînê
Tenê bi hêsirên te ya dilşikestî
Bibe rûgeha evîndaran
Da ku tu car
Nemire evîn û
Bêwar nemînin, evîndar

Fîlmekî nû li ser kurdistana sûriyê tê amade kirin

Derhênerê Kurd Hiner Selîm eşkere kir ku ew dê filmekê li ser Kurdistana Suriyê amade bike. Piştî ku filmê wî 'Dol' di Festîvala Filman a Navneteweyî (Berlînale) de hate nîşandan, Selîm ragehand ku ewê di filmekî taybet de behsa êşa Kurdên li Kurdistana Suriyê û herwiha siyaseta rejîma Suriyê li dijî wan bike. Selîm ji Malpera Amûdê re diyar kir, ku Kurdistana Suriyê ji wî re pir girîng e û ev para Kurdistanê di dilê min de ye. Derhênerê kurd herwiha diyar kiri ku ew bi hin kesan re li ser vê pirojektê axivtiye, bêyî ku ew çi agahiyên din bide.

Jêder: amude.com



Xelata Oskar, Ya Sala 2007'an



Rê û resma xelata Oskar, ya sala 2007'an, ji bo sinemayê, şeva yeşem, 06.12.1385(25.02.2007)'an, dest pê bû.

Di rê û resmê de, "Martin Scorsese", weke baştirîn derhêner seba derhênana filma "The Departed" (Yên ji dest çûyî), hate xelatkirin. Xelata baştirîn ektera rola jin di filma "The Queen" (**Şa jin**) de, gihîştê xatûna "Helen Mirren" û xelat baştirîn ekterê mêr jî gihîştê "Forest Whitaker", seba rolê wî di filma "The Last King Of Scotland" (Paşayê dawiyê yê Skotlandê) de.

Oskara duyemîn rola baş ya mêran gihîştê ekterê filma "Little Miss Sunshine" (Laqirdiya biçûk a Senşin), "Alan Arkin" û xatûna "Jennifer Hudson"ê jî seba lîstin di filma "Dream girls" (Keçên xwevnan) de, xelata vê beşê bir.

Filma Almaniyayî ya "The live of Others" (Jiyana kesên din), xelata Oskara baştirîn filmên bîhanî, wergirt. Di para filmên kartonî de xelata baştirînê gihîştê filma kartonî ya "Happy feet" (Lingên bextewer) û her wiha di para filmên komêdî de, filma "West side bank" (Çiroka qeraxa Xezeyê), Oskara baştirîn filma kurt ya komêdî bir.

Di heman rê û resmê de çend xelatên din jî pêşkêşî senaryo (çirok), deng, derînanên hunerî yên taybet, mîksaj û montajê, hatin kirin

Ji bo bersîvdana Xaçepirsa hejmaran (Sudoku)yê, tenê van sê xalên jêrîn berçav bigirin:

1. Hejmarên 1-9'ê di xet(xêz) û stûna serjêr de tenê carekê dubare dibe.
2. Hejmarên 1-9'ê di xet(xêz) û stûna çeprast de tenê carekê dubare dibe.
3. Hejmarên 1-9'ê di nava çargoşeke 3x3 de tenê carekê dubare dibe.

Bersiva Sudoku a Hejmara 55'an

7	1	8	3	6	5	4	9	2
4	3	6	1	2	9	5	7	8
5	2	9	7	8	4	1	3	6
8	7	5	2	1	6	9	4	3
2	9	4	8	5	3	6	1	7
1	6	3	4	9	7	2	8	5
3	8	2	5	4	1	7	6	9
9	4	7	6	3	2	8	5	1
6	5	1	9	7	8	3	2	4

Xaçepirsa Hejmaran (Sudoku)

1	6				7	5	3	8
4	2	3	9				7	1
	7			6			9	2
	1		8			2	5	6
		8		5	6	7		3
2				7	3			
5			6	4				
6	3	4	7					5
7	9	2	5	3			6	4

Em Qebûl Nakin Li Herêma Kurdistanê De Şer Li Dijî PKK'ê Were Meşandinê

Birêz Mesûd Barzanî, Serokê Herêma Kurdistanê ev nûçeyê ret kir ku ji aliyê herêma Kurdistanê ve çek û alîkarî ji PKK'ê re hatibine kirinê û got: "Ew kesên ku îdiaya vê nûçeyê dikin bila belgeyên xwe pêşkêşî me û raya giştî ya Turkiyeyê bikin". Herwiha got: "Em li Herêma Kurdistanê de qebûl nakin ku şer li dijî PKK'ê bê meşandinê".



Ger sînorê Kurdistanê bihê bezandinê, em bêdeng namîn in

Derheq encamdana operasyonên leşkerî li nava xaka herêmê de got: "Ger êrîşa leşkerî li nav xaka Turkiya de bê kirinê, eva girêdayî bi ç wan e, lê sînorê Kurdistanê bihê bezandinê em bêdeng namîn in. Turkiya çiqas serweriyê bi xwe bide em jî ewqas dê girîngiyê bi serweriya xwe bidin. Em dê welatê xwe biparêzin û eva jî mafê berheq yê me ye".

Derheq mekanîzama berbirû bûna her sê aliyên Amerîka, Turkiya û Îraqê bi nisbet çareseriyê pirsê PKK'ê re got: "Mijara han çî li Hewlêrê be û çî jî li Bexdayê, dikare were goftugo kirinê. Li vê derheqê de helwesta me rohn û eşkere ye. Ger rêçareyêke aştiyane li cihê leşkerî bibe armanc, em dê bibin bi parek ji prosesê, lê berevajî wê, em beşdariyê tê de nakin".

Nabe dewleta Kurdî bi xeyal bihê zanîn

Birêz Barzanî herwiha li ser avakirina dewleta Kurdî wiha axivî: "Nabe dewleta Kurdî bi xeyal bihê zanîn, belkî divêt bi rastiyek bihê mêzêkirin. Bo vê meremê jî renga em bi Ereba, Turk û Îraniyan re bigihîjin armançekê".

Herwiha got: "Divêt Turkiya û Îran adet bi vê ra û dîtinê bikin ku Kurdan jî mafê dewleta serbixwe heye".

Dîrok li hemberî gelê Kurd de dadperwerane nebûye

Serokê Kurdistanê da zanîn ku "Kurd li deverê de xwedî nasnameyek 40 milyon kesî ye, mixabin dîrok li hemberî gelê Kurd de dadperwerane nebûye û Kurdistan li ser çend welatan de hatiye parvekirinê. Lê cehd û tekoşîn bona têkdana nasnameya Kurdî û bi Ereba, Turk û Farskirina wan jî serkevtî nebûye û ne rêya çareseriyê pirsê gîrêkan bûye".

"Lewre sistemek serbixwe mafê rewa û berheq yê Kurdan e. Ez weke takekê dibêjim bila em ew kosp û arîşeyên navbera Kurd û cîranan de, rakin. Bona vê yekê jî dewletek serbixwe ya Kurdî bi tund û tûjiyê re çê nabe, ji berku li rêya jihev têgihîştin û parastina berjewendiyên bi dest tê".

Diyalog baştirîn rêçare bo çareserkirina pirs û têgehîştinên şaş e

Barzanî herwiha li ser hewlên Turkiyê bo pêwendî û diyaloga bi Herêma Kurdistanê re got: "Em li hemberî wan hewlane de keyxweş in, çimku em li ser vê baweriyê ne ku diyalog baştirîn rêçare bo çareserkirina pirs û têgehîştinên şaş e. Çimku em cîranên hev in, diyalog bo berjewendiyên her du aliyên hewce ne û take rêya parastina berjewendiyên gelê Kurdistanê û Turkiyê li wê de ye."

"Peyamner"



Biderewzanîna Nûçeyekê: Endametiya PDK Îranê Di Enternasyonala Sosyalîst De Nehatiye Helawîstin

Di nûçeyek nerast de ku di malpera Rênesansê de belav bûye, hatiye ku endametiya PDK Îranê di Enternasyonala Sosyalîst de piştî veqetiyana taqîma Restîgar(Mela Hesên), jî PDK Îranê, hatiye helawîstin.

PDK Îranê endamê "Obzêrvêr" ê Enternasyonala Sosyalîst e û cudabûna taqîma han tu bandorek bi ser endametiya partiyê de nebûye. Hin aliyên din ên Kurdên Îranê jî wek takekes, di çend rojên borî de ji aliyê birêz Loyîs Eyala, Sekreterê Giştî yê Enternasyonala Sosyalîst ve, hatine wergirtin.

Bi vê hincetê û hevdem tevî biderewzanîna nûçeya malpera Rênesansê, hêvîdar in ku kesên ku di vê derheqê de nîgeran in yan jî pirsyarek hene, seredana malpera Enternasyonala Sosyalîst bikin û her wiha dikarin tevî nûneriya PDK Îranê li derveyî welat de pêwendiyê bigirin.

PDK Îranê – Nûneriya Derveyî Welat

Bi Sedan Kes Li Belûçîstanê De Hatî Girtin



Piştî teqîna roja 25'ê Rêbendanê li bajarê Zahîdanê ku bû sebebê kuştin û birîndarbûna 44 kesan, hêzên Rejîma Komara Îslamî bi sedan kes ji xelkê Belûçîstanê destbiser kirine.

Li gor nûçeyan rewş û etmosfereke polîsî li devera han de hakim e û tenahî û ewlehiya xelkê deverê bi metirsiyê re berbirû kiriye. Sedema vê jî vedigere ser tund û tûjî û givaş û tepeseriyê xelkê vê deverê ji aliyê hêzên rejîmê ve.

Hêjayî gotinê ye ku li çend mehên borî de, çend teqîn û pêvçûn ji aliyê girûpek çekdar bi navê "Cundîla" tevî hêzên rejîmê çêbûne û rejîmê çend kes ji xelkê bê guneh bi tawana beşdarî li teqînan de îdam kirine.